

## 2 TESALONAIKA

# Poloyo Tesalonaika Yeneke Taku Takoa Wia Wetekane Pipia

<sup>1</sup> I pipiapa no Polo Sailasita Timosi toa wia wetekako-ye. Nipa toneketai Akolali Ali Muno Yesu Keraisuta kita patu kautakoa kaki-kiti kini Tesalonaika take mekika wini wetekako-ye.

<sup>2</sup> Toneketai Akolali Ali Muno Yesu Keraisutame kiwi pewe wia tepe kolotini kilikoa pikoa toe wa kini kowitikako-ye.

<sup>3</sup> Tone oya-lawe kiwike Akolali-pala ke wa-kama amedeko. Yesunole takama pote kini kini wene mekanali yoa tikilepa kini namolo tokoinakale moa patukoa wedoa toomoa pikete tikili tekete ni oko-ye.

<sup>4</sup> Widikakilekepa Akolaline ali atoa koukoa meki toa totome eya wa mate agale ou toa oma yako. Ete yename kipala poi tēia eni ke enekakolo mea tete-pala moma yaketeke Akolalike wedoa wene tuga mea onekele takoa togoa tiki wa totome kiwi kei pia oma yako-ye.

*Akolaliyo Ali Atoa Takoa Enekilepa*

*Kiyoke-kama Tokomo*

<sup>5</sup> Kiwi widikoa mekino, Akolaliyo ali atoa kiyoke-kama takoa enoo tadekolo uku. One talo tuku take noatiki yene takoane eneku wa wini ke

enekakolo mekete tikile Akolaliyo enekakolo ni uku.

<sup>6</sup> Akolaliyo edikoa kiyoke-kama tikilepa kiwi toa potokaki yene kibu moa too.

<sup>7</sup> Nitapa tete mokoa kaki-kiti kiwi ko meamene wa toto-pala ko mekoo. Ali Muno Yesu a tibu kawa noka-pete nitoo. One nikilepa one telekole toma yaki edelo ali-kiti-pala opia noo.

<sup>8</sup> Nitoa toe itipono-pala oa kakeneya nokome eya too. Akolali kote tokale wene toameneya mekoi-kiti ni tone Ali Muno Yesunomo litia toamadete wakoi-kiti kini eni tokoike nami wia kibu mootapeoo.

<sup>9</sup> Nitoa kibu motokale moa atukatapeneya mea kawei. Nipa Ali Munono lene timini enamene ya mea one telekole tokome p̄a tootapeneyamekata ketekaneya pa mea kawei.

<sup>10</sup> Enipete Ali Muno wakapea nikilepa one ali atoame one kei pia ni oneke wene tugoa mekoi peyame ke wa kā oa kawa tomotoa too. Kimeka Yesunomo wini oa metekoonakamo yakoa motokoina tekete nitoi.

<sup>11</sup> Eni wene taneya mekete tone Akolali-pala eya wa kini kowitikakala toko-ye. Neke kayo oa motokana yene mea epetekatiki toa Tesalonaika yeneka mea epetekamoton ta wa kini kowitikako-ye. Nipa padele padele epetanele tou wa kime wene pia ni Yesuke wene tugoa mekete ile tou wa wene piki toa-kama toa togamoton, neke tele lukoa auapekala tamene wa kini kowitikako-ye.

<sup>12</sup> Eni kowitiko toa mea epetekakete kini Ali Muno Yesuno peku noa tokoile enekete ete

yename Yesu dikane ago tadeko wa one kei pia kawei. Nipa toneketai Akolali-pala Ali Muno Yesu Keraisutame kiwi pewe-kama witikoile enekete ke wa kiwika kei pikala toi.

## 2

### *Akolali-pala Pine Wia Poi Teigo Ago*

<sup>1</sup> Anu oya-lawe tone Ali Muno Yesu Keraisu oto wakapea nokome toto moa koukatekamo olaukaketepa kipala eya wa oko-ye.

<sup>2</sup> Ali Munoyo ali atoa takoa enateko ta wete patadeko wa emo kumo okoimo kugu yateketepa eina eina wene bebo oa kā oa piti moameamene. Nipa panagome Akolaliyo akamene wa oka toane uku wa eni kugu yakoaka ni padame mo wia kakamo kugu yakoaka ni panagome no Polo-laweme pipia wia wetekakome oka toane uku wa eni kugu yakoaka ee nimini wa yakoa moameamene.

<sup>3</sup> Pade-kitame enika enimo oa yotokakayano, eya wa wene taneya meamene. Eni ta wete patameneyake ali atoa peya matiyame Akolaline totono tagama yawei. Eya agoka Setanuno peku pine wia nootapea poanele-kama toko agoka keleyo witanoo. Akolaliyo moa atukateka agoke uku.

<sup>4</sup> Einago nokome eya too. Ali atoame iya godeke eya godeke lodo yato wa lodo yotokoiya godekiti-pala poi tēia paya tetepo takoa wao. Ni ali atoame iya kowitato wa kowitikoiya peya paya tetepo takoa poi tēima poo. Nitoa wipitikome onepa Akolali kaku wa Akolaline tobou losu yapu pome mepoo.

<sup>5</sup> Inapa kipala wida mekene okounakamo ukuno, nimini ukutu-pe.

<sup>6</sup> Einago noateka oi ponokale taateko a noatekoyake papete panagome ka ketekako. One keleyo noateka ka ketekako agopa kime wene tekete tiki.

<sup>7</sup> Akolaline totono kautoa enoai tikilepa opi paigakoa mea toko. One noateko ka ketekao a kako agopa wete tewitikoa poameneyake nitoa meko.

<sup>8</sup> Wa naniko tewitikoa pokale eni poanele-kama tokago keleyo kawoo. Nitoa kakaka Ali Muno Yesu wakapea nokome moa atukoo. Nipa one oka poomeme wia tukoa one pā teleta tootapeneya nokame moa kautoa too.

<sup>9</sup> Nitatekoyake papetepa eni poanele-kama tokago Setanu patu kautakoa kakome ele kule kapene telekole toka matiyame ali atoane wene kainya pikakala too.

<sup>10</sup> Nipa padele padele poanele tokome tua atua poatekoi yene tolopi tokala too. Eni yename Yesuke nimini akenemopa yateketekete ke wa wene mekamekete kiwi toa moatekale kote moa wakete tekete tua atua poi.

<sup>11</sup> Nikepa eni yename kapene agale yakoa momotoa tokome Akolaliyo kini wene moa bebo akatapeoo.

<sup>12</sup> Eina niminimo yakoa moamadete wakete poanele tato wa wedia mea tokoi peya kibu moademe nitoo.

### *Poapeneya Kamene*

<sup>13</sup> Tone oya-lawe Ali Munono kolotini yene ki-wikepa Akolali-pala ke wa-kama amedeko. Tokome ke wa ikilepa Akolaliyo eya tanele-kitike

toko. Tibu itonota wete latiameneyake kiwi toane mou wa takoa motaneya. Nipa one Epetane Yominiyo wene takaka toa itonole wawa onekele takama pote ni one niminimo yakoa moa tokoli toane mou wa takoa motaneya.

<sup>14</sup> Nitou wa eni wene toopikana toa taatekakome eya toka. Keraisunomo totome oa aua yakomo yakoa momotoa tokome kiwi kayo oa motoka. Nipa tone Ali Muno Yesu Keraisupā teleta tootapeneya meko peku kime noati wa kayo oa motoka.

<sup>15</sup> Nitikanano, anu oya-lawe kipala eina okoon-akamopa kabunume oa mea pipia wia wetekakete oa tokoonakamo wedoa pikoa kato wa poapeneya kamene wa totome oko-ye.

<sup>16-17</sup> Akolali totoke wene meko mekome tokome eya toko. Tone wene weye-kama akoa ni kiwi auapekene dikouno, nepia meamene wa pewe wia kako. Nitikono, tone Ali Muno Yesu Keraisutoneketai Akolalita-pala eya wa kini kowitikako. Padele padele epetanele toa pademo pademo epetanemo oa tomotono, wene weye akoa auapeamene wa kini kowitikako-ye.

### 3

#### *Poloyo One Kowitikamene Wa Akenemo*

<sup>1</sup> Tone oya-lawe kipala eya wa wipitia oko-ye. Tone kowitikakilepa Akolali-pala eya wa kowitikamene. Ali Muno agonomo wete oa pupitikamotonu ta. Onekemo kime yakoa motekete ke wa kei pia tokoonakale ete take pitiki yenameka yakoa tomotono ta wa kowitikamene-ye.

<sup>2</sup> Ali atoa peyame Keraisunomo yakoa moamikiyano, eya waka kowitikamene. Poanele toa etepea yaki-kitame toto-pala padele poanele tokoli toa moamene wa tone kowitikamene-ye.

<sup>3</sup> Ali Muno agome tou wa okale-kama toko. Nitane ago tokome kiwi poapeneya kamotoa yopia mekome poane ago Setanu ete pedeka pedeka too.

<sup>4</sup> One patu kautakoa kakete eya wa oko-ye. Tamene wa totome kipala okoona toa-kama kime yakoa litikete tiki. Ni padeleka tamene wa okoo toa-kama litikala toino wene totome toko-ye.

<sup>5</sup> Ali Muno Keraisu-pala eya wa kini kowitikoa oko-ye. Akolali kiwike wene mekaoa mekole ni onekele neme poti takoa togakole i i wa yame yame tamene wa kini kowitikako-ye.

### *Loyo-kala Meamea Wa Mane Mane Akenemo*

<sup>6</sup> Anu oya-lawe eya tamene wa Ali Muno Yesu Keraisu patu kautakoa kakete oko-ye. Kini oya-lawe padeka-kitame tone olaukakoona toa litia toamoa loyo-kala mekete tikino, dikane yenepa titi toma yamene.

<sup>7</sup> Totome tokoonakale kime litia tamedeko wa kime wene tekete tiki. Kiwi pakeke wida meketepa loyoka meamokoona.

<sup>8</sup> Nipa kini yapu note menoketepa kini nee eya pa moa nakoona mena. Nitameneya kinikiya pa oia moamato wa kinikiya pade mouketepa ete pia oto pia pupu tokoa kakoo.

<sup>9</sup> Nipa kinikiyapa pa oia moamele tokoyake oia moamokoona. Nipa kini Keraisunole takakete toatekoi adeka pia teketepe onekemo pa oma yakoona.

**10** Kiwi pakeke mekete eya wa olaukakoona. Pupu toamou wa wene pikagopa nipa nepa nee noameneya pa meamene wa olaukakoona. Ni edoa-mo.

**11** Opi i take mekete yatekolo kiwi padeka-kiti loyo-kala meketekete ete yene pupu tikika pekete ile ta ile ta wa pale toa kaki wa akedikili yateko.

**12** Ali Muno Yesu Keraisuno agale patu kau-takoa kaketepa eya tamene wa totome edikaki yene mane oa moa pubu oa toko-ye. Kini noatiki nee eya moadetepa poti kilikoa mea pupu tokala tamene.

**13** Anu oya-lawe kime yete pade ali atoa auapekala tikilepa koome tukene waku wa wawameneya pa toa togamene.

**14** I pipia wini wia wetekakete tamene wa okoomo panagome litia toamokolopa nipa onepa dikane ago tadeko wa titi toma yamene. Poanele eni tekene tadeku wa ya momotoa tekete ni okoye.

**15** Dikane agopa kipala poi tejane ago tetepo takamekete kini oyago tetepo takoa mane oa moamene-ye.

### *Poloyo Wipitikome Akenemo*

**16** Kini tepe kolotini kilikoa pikako ago Ali Munagome enabuna ele kule tokome kini tepe kolotini kilikoa pikamotoa kini kowitikako-ye. Ali Muno ago kiwi peya-pala opia memotoa waka kowitikoa oko-ye.

**17** I wipitiane lionate ukumopa noanu yoname witiku-ye. Noanu pipia witikene-kama ipa Poloyo witaneyea tadeko wa ali atoame oi motekete wene tomotoane tekene nitikala tuku.

**18** Ali Muno ago Yesu Keraisuyo kiwi peya pewe  
wia yopimotoane uku-ye.  
Opa anu agale eni.

**Weneya Totono Keraisu Yesunomo  
The New Testament in the Witu Language (also known  
as the Wiru Language) of Papua New Guinea  
Nupela Testamen long tokples Witu long Niugini**

copyright © 1990, 1992 Wycliffe Bible Translators, Inc.

Language: Witu (Wiru)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 18 Apr 2025 from source files dated 31 Aug 2023

160088da-6131-52e6-9b0f-c3dc6e8c6abb